

Sino si Santa?

Ni Ryan V. Labana

Kaaalis lamang ng mga batang nangangaroling sa bahay nina Angelito. Masayang-masaya ang buong mag-anak dahil napuno ng malulutong na tawanan ang kanilang buong tahanan. Sinabayan kasi ni Angelito ang mga bata sa pagkanta ng mga awiting pamasko.



“*Abrembrem broom,*” ang bigkas niya sa “*...prepare Him room*” ng kantang *Joy to the World* kaya’t nagsihagalpakan ang tawanan ng kanyang mga kapatid na sina Alwina at Angelo pati na rin ng kanyang nanay at tatay. Natatawa rin naman siya sa pagkakataong iyon ngunit hindi dahil sa nakakatawa niyang pagkanta kundi dahil sa nakakahawang halakhakan ng buong pamilya.

“Oh tama na ‘yang tawanan ninyo,” maluha-luha pang sambit ni Nanay Lily habang pinipigilan ang walang humpay na pagtawa. “Panahon na upang maghalungkat kayo ng

lumang medyas. Sa susunod na linggo ay daraan sa ating bahay si Santa upang lagyan niya ito ng mga aginaldo!”

“Yehey!” sigawan nina Alwina at Angelo. Si Angelito naman ay nakatunganga lamang. Naiwan tuloy siya ng dalawa niyang kapatid na dali-daling umakyat sa kanilang kwarto upang maghanap ng mahaba at malaking lumang medyas.

“Oh, Angelito! Ano pa ang hinihintay mo?” sambit ng kanyang Tatay Ricardo. “Maghalungkat ka na rin ng lumang medyas sa kwarto nang may maisabit ka sa ating bintana. Tiyak na lalagyan ito ni Santa ng mga surpresang aginaldo.

Dali-daling umakyat si Angelito sa kanilang kwarto. Nadatnan niyang nagpapalakihan ng medyas sina Alwina at Angelo.

“Ate Alwina, Kuya Angelo, sino si Santa?” tanong niya na puno ng pagtataka.

“Si Santa Klawns ay isang malaki at matabang mamà ngunit siya naman ay mabait at malambing. Ibinibigay niya ang lahat ng ating mga *wishes*.” Iyon lamang at muling naghalungkat ang magkakapatid ng pinakamahaba at pinakamalaking medyas.

Ilang minuto rin ang nakalipas bago bumaba ang tatlong magkakapatid mula sa kwarto. Dala-dala ng mga ito ang pinakamalaking medyas na nahalungkat nila sa isang malaking kahon.

“Patingin ng napili mong medyas, Alwina,” malambing na sambit ni Nanay Lily. Inilabas ni Alwina ang medyas na ginagamit ng kanyang tatay noong naglalaro ito ng *soccer* noong binata pa lamang ito. Hanggang tuhod ang haba nito ngunit may maliit na butas sa sakong.

“Eh paano kung lagyan ni Santa ng kendi ang iyong medyas, eh di, magkakandahulog iyon sa bandang sakong nito,” sabat ng kanilang nakangiting tatay.

“Eh, malaking *Barbie Doll* naman po ang hiniling ko kay Santa kaya hindi po iyon mahuhulog sa maliit na butas na nasa sakong,” nagkatinginan ang kanilang tatay at nanay at sabay na ngumiti.

“Eh ikaw, Angelo, patingin kami ng medyas na napili mo,” halos sabay pang sambit ng kanilang mga magulang.

Inilabas ni Angelo ang isang maluwag na *stockings* ni Nanay Lily. Muli na namang humagalpak sa tawa ang kanilang nanay at tatay. Si Angelito naman ay hindi pa rin maipinta ang mukha sa kalituhan.

“Tiyak na mapupunit ito kung lalagyan ni Santa ng bolang pang-basketbol,” sambit ni Tatay Ricardo.

“Isang mahabang laruang tren po ang hiniling ko kay Santa kaya tiyak na kakasya iyon dito sa lumang *stockings* ni nanay,” pabibo nitong pagpapaliwanag. Muling nagkatitigan ang kanilang nanay at tatay at sabay na ngumiti.

“Nasaan naman ang napili mong medyas, Angelito?”

Dahan-dahang inilabas ni Angelito ang mumunting medyas na ginamit niya noong siya’y isang taon pa lamang.

“Ha-ha-ha-ha-ha!”

Tumawa si Alwina. Tumawa din si Angelo at mas lalong lumakas ang tawanan nina Nanay Lily at Tatay Ricardo. Dumagundong ang napakalakas na tawanan sa kanilang buong tahanan.

“Sino po si Santa?” ang tanong niya.

Biglang naputol ang tawanan ng mag-anak.

“Siya ang magbibigay sa inyo ng aginaldo,” pinilit ni Nanay Lily na ituwid ang pagsasalita nito dahil sa hindi pa rin maubos na pagtawa. “Tingnan mo ang medyas na pinili nina Alwina at Angelo. Hindi ba’t ang lalaki ng mga medyas na pinili nila? Iyon ay para maraming mailagay na aginaldo si Santa sa panahong tayo ay kanya nang binisita.”

“Ano ba ang gusto mong aginaldo mula kay Santa?” sumingit na sa usapan ang kanyang tatay.

“Gusto ko po kasing matutong kumanta. Pinagtatawanan niyo po kasi ako kapag kumakanta ako ng *Abrembrem broom*. Gusto ko rin po sanang sumamang mangaroling sa mga kaibigan nina ate at kuya kaso hindi ko po kabisado ang *Sa may bahay* at *Pasko na naman*. Kaya po, gusto ko po sanang hilingin kay Santa na matuto na akong kumanta para po ako ay maging masaya,” sinserong pagpapaliwanag ni Angelito na para bang matanda na sa paraan ng kanyang pagsasalita. Nagtawanan sina Alwina at Angelo ngunit mukhang hindi

na iyon nakakatawa para kina Nanay Lily at Tatay Ricardo dahil hindi na sila humalakhak pa.

“Ah-eh, anak, mga laruan o di kaya ay kendi lang ang ibinigay ni Santa sa mga bata. Mag-isip ka na lang ng nais mong laruang ibinigay sayo ni Santa,” seryosong sambit ni Nanay Lily.

“Eh, diba po pwede naman tayong bumili ng laruan sa *mall*? Bakit pa po ako hihingi kay Santa?” nakakunot ang kanyang noo habang pilit na iniisip ang kung anong espesyal ang mayroon kay Santa.

“Mas magaganda ang mga aginaldong laruan ni Santa,” paliwanag ulit ng kanyang tatay.

“Saan po nanggaling si Santa, tatay?”

“Sa langit?” Marami siyang regalong dala mula sa mga malalambot na ulap.”

“Siya po ba si *Jesus*?”

“Siya ay inutusan ni *Jesus* upang pumunta dito sa lupa upang mamigay ng aginaldo sa mga mababait na bata katulad mo at ng iyong ate at kuya,” pilit na pagkukumbinse ni Tatay Ricardo sa kanya.

“Nanay, pwede po ba akong humiling kay *Jesus* na sana ay marunong na akong kumanta at makabisado ko na ang mga kantang pamasko upang makasama na ako sa pangangaroling ng mga kaibigan nina ate at kuya?”

“Ganito na lang anak,” hinawakan ni Nanay Lily ang mga balikat ni Angelito. “Tuturuan ka na lang nina Ate Alwina at Kuya Angelo kung paano kumanta ng mga awiting pamasko, OK?”

“Yehey!” lumundag siya habang napupuno ng galak at saya ang kanyang puso.

“Sa ngayon, humanap ka na muna sa taas ng mas malaking medyas para mas maraming mailagay na aginaldo si Santa,” si Tatay Ricardo.

“Mamaya na lang po, Nay,” sambit nito at pagkatapos ay bumaling na sa kanyang mga nakakatandang kapatid. “Ate Alwina, Kuya Angelo, turuan niyo na po akong kumanta para makasali na po ako sa pangangaroling ng inyong mga kaibigan.”

Malugod namang sumang-ayon sina Alwina at Angelo. Nagtungo sila sa balkonahe ng kanilang bahay. Sumabay sa kislap ng mga makukulay na ilaw ang melodiyang pilit na ginagaya ni Angelito mula sa kanyang Kuya Angelo at Ate Alwina.

Si Nanay Lily naman at Tatay Ricardo ay naiwan sa sala. Dinampot nila ang maliit na medyas na inilapag ni Angelito sa sahig.

“Sino nga ba naman talaga si Santa?” sabay nilang sambit sa isa’t isa. Sumunod ay niyakap nila ang isa’t isa.